



RAPPORT PRESIDIEL 2023

A MAUN DA LA RADUNANZA GENERELA DALS 18 SCHNER 2024

Stimedas commembras, stimos commembers

Schner/favrer 2023; radunanza generela e tschaina da chatscheders

La radunanza generela es steda implida cun üna pruna tractandas, traunter oter vains decis da cumprer üna cella da sfrader e defino il lö a S-chanf. In seguit a la rad. vains pudieu guardar culs cumüns La Punt Chamues-ch, Zuoz e S-chanf ch'els ozan il sustegn annuel, uschè cha per la secziun resta sulettamaing il cuost da l'investiziun ed in futur il mantegnimaint (Madulain nu's vulaiva partecipar).

Nossa saireda tradiziunela ho gieu lö i'l restorant Engiadina a Zuoz. La tschaina es steda stupenda, il trategnimaint cul cor da las Lodolas grandius. La cumischiun da trofeas s'ho danövmaing do granda fadia da preparar üna bella paraid – grazcha fich per vos ingaschamaint.

Avrigl/meg 2023; radunanza da prümavaira, lavur cumöna

A la radunanza da prümavaira, chi ho gieu lö a Zuoz vains pudieu preschanter duos offertas per cellas da sfrader e fer bun l'import per la cumpra da quista.

Al di da la lavur cumöna vains refat cun ün pêr pochs ma motivos commembers la saiv dal golf a Zuoz.

Gün 2023; di da chüra ufficiel

In collavuraziun cul forestel La Punt/Madulain, ils candidats dal district VII ed ün pêr pochs però fich ingaschos commembers vains pudieu danövmaing refer la saiv da raunas falambra traunter Zuoz e Madulain.

Lügl/avuost 2023; salvamaint uzöls, gita da chatscheders, tirs, e montascha cella da sfrader

Adonta cha d'eira dad esser sül lö per part fingià las 4 e mez a bunura sun stos tuot ils agüdaunts e pilots fich ingaschos e motivos düraunt lur numerus ingaschamaints. Per glivrer la stagiun da salvamaint ho que do üna buna tschaina illa Veduta. Ingrazcher fich vules ad Erwin ed Armon per la stupenda coordinaziun ed a tuot la squedra per l'ingaschamaint straordinari.

Per müder giò ün po il program, ho quist an gieu lö la gita insembel cun la secziun Engiadin'Ota sur il pass dal Muretto cun soggiorn i'l rifugio Tartaglione Crispo. Adonta pitschnas differenzas traunter ils partecipants düraunt la gita, haun quellas pudieu gnir scholtas düraunt la biera a la saira.

Danövmaing vains pudieu mner tres noss tirs sü Muntarütsch a Samedan. La spüerta da pudair trer be nossa societad vain nüzageda minch'an meglra e'ls tirs sun in regla bain frequentos. In quist connex vules ingrazcher fich als maistertregants per Lur grand ingaschamaint a favur dals tregants e la secziun.

L'incumbenza da la rad. da prümavaira es steda, cha la cella da sfrader es pronta per la chatsch'ota 2023. Grazcha al ingaschamaint da Gudi scu mainaproget cun grand agüd da Crigel, Givi e Cudo es que reuschieu da fer que be düraunt il mais avuost in temp da record. In nom da la societad vules ingrazcher fich a Crigel, Givi, Cudo, Gudi e Duri per vos grand ingaschamaint.



Per glivrer vless ingrazcher cordielmaing a mieus collegas suprastants per las bunas discussiuns düraunt noss rapports mensuels e per la stupenda collavuraziun. Impü natürelmaing a tuot ils commembers, chi's mettan aint activmaing a favur da nossa secziun. Pel 2024 giavüsch a tuots in buocha d'luf, e bgeras bellas uras da cumpagnia.

Cun salüds chatschedrigls,

Gian Andri Godly
President societad da chatscheders Dros löng

Brail, schner 2024